

tissimè elaborata, aut latrunculos lusorios, aut bombardulas ligneas viginti quinque, torno itidem elaboratas, & curribus impositas, omniq; supellectile bellicâ necessariâ instructas, unâ cum triginta calculis, mediocri piperis grano excavato indidisse, quod passim videt stupetq; Germania atq; Italia: (21.) nihilomi- 21.
nûs tamen horum aliorumq; minutissimorum torematum subtilissimum artificium multis parasangis superat Microscopium, quippe quod multa corpora, quæ omni vitâ & animâ destituta esse hucusq; creditum est, vivere docet, quod invisibilia visibilia reddit, obscura & confusa clarè & distinctè repræsentat, è muscâ fermè elephantem facit, maximam deniq; DEI potentiam in minimis sapientissimè ludentem stupentibus inspectantium animis prodit. (22.) 22.

In efficiendis autem his præ aliis excelluerunt *Manfredus Septala*, Mediolanensis Canonicus, *Eustachius Divini*, atq; *Hookius*, cujus *Micrographiam* qui legerit, ille Angliæ in hoc artificii genere palmam hæctenus deberi non invitus fatebitur. Cuspis enim acûs alicujus subtilissimæ, aliàs imperceptibilis ferè, apparuit *Hookio* per Microscopium suum tam lata, quàm quarta pars unius digiti est. Acies novaculæ benè acutæ tanquam dorsum caninum observata est, subtilissimæ telæ crassitie chordas adæquarunt. Vilius nihil est, quàm pediculus, ratio tamen quâ repræsentatus *Hookio* fuit per Microscopium, tam est notatu digna, quàm horridum est aspectu insectum ipsum, quippe quod sesquipedalem excedit longitudinem. Nihil autem impensius admirandum est, quàm illud, quod de Situ confirmat ingeniosissimus author; testatur siquidem, cum maculam aliquam Sitûs, quæ in libri involucri erat, per Microscopium aspexisset, se distinctè observâsse, eam nihil aliud, quàm conglomeratam quandam variorum florum è rubicundis caulibus diversimodè efflorescentium multitudinem esse. Vt plura alia stupenda phænomena, in *Ephemeridibus Gallorum* prolixius excerpta, brevitatis studio nunc negligam. (23.) 23.

C

Post-